

DOMENIE VIII «VIE PAL AN»

Jutoris pe Liturgjie

Ai 03 di Març dal 2019

Il discors di Jesù su lis “beatitudinis” cul - veit remission, perdonait, dait... - si sta ormai concludint. Intant l’evangjelist al cjale a la sô comunitât e forzit, a concludin i studiâts, le viôt puare e dividude fra guidis svuarbadis, prepotencis, rivalitâts e judicis pesants fra di lôr. Erino ancje culî come a Corint li che un al diseve: “Jo o soi di Pauli” “Jo invezit o soi di Apol” “E jo di Chefa” “E jo di Crist” ? (1 Cor 1, 12).

O assistìn in chestis zornadis - Rome, incuintri presidents conferencis episcopâls - a un procès mediatic li che cence miezis misuris la glesie catoliche e je svergognade daprûf dal mont intîr.

Cheste nestre glesie e à tant pecjât in autoritarisim e divisions, podê, abûs di ogni gjenar, sentencis e condanis... e cumò si cjate segnade a dêt, sbeleade, judicade e condanade in plen. Justamentri.

O vivìn un moment dramatic, tremant, di scomparî sot tiere.

E nus ven di confermâ: “Ancje tai nestris paîs il clericalisim dai predis al à fat par secui il biel e il brut timp. Al à tormentade la int, tignude sot, plui che liberade. A dî pôc.

Vuê il vanzeli nus cjacare di varps, di trâf, di frosc, di cûr trist. Cheste peraule di Crist, o vin di scoltâle, dute la comunitât, a cjâf bas.

Antifone di jentrade

cf. Sal 17,19-20

Mi à tignût sù il Signôr,
mi à liberât e puartât te largjüre,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progjet di pâs,
e la tô Glesie e puedi servîti contente e cence pôris.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Sir 27,4-7

No sta dî ben di un prin di vêlu viodût a resonâ.

Pes nestris comunitâts al è rivât, ancje masse tart, il moment di cambiâ. Ogni persone batiade, propit par vie dal Batisim, e à il dirit e la dignitât di proferî une proprie peraule te glesie; ancje e soledut devant dai socestants. “Bisogna dire tutto quello che nel Signore si sente di dover dire senza rispetto umano, senza pavidità, ascoltare con umiltà e accogliere con cuore aperto quello che dicono i fratelli. Occorre parlare chiaro e ascoltare con umiltà (pape Francesc an 2016).

Il Fi di Sirac nus consegne vuê dome un fruçon di un disserniment critic e di un bon sens madûr. Nus invade a finîle cun chel babâ superficial fat di cjacaris e di caluniis; nus fâs cirî il ben de persone umane soledut se feride, plaiade, tormentade.

Dal libri dal Fi di Sirac

Scjassant il tamês al reste il patûs,
cuistionant cuntun a vegnin fûr i difiets.
Il for al rifinis i creps dal vasâr,
cussì il resonament al palese il naturâl di un om.

De pome si presee chel ch'al tire sù l'arbul,
cussì dal mût di fevelâ il profont dal om.
No sta dî ben di un prin di vêlu viodût a resonâ;
dome li e je la prove di trop ch'al vâl.
Peraule di Diu.

SALM RESPONSORIÂL

dal Salm 91

Chest tocut di salm, al ripuarte une riflession-preiere su la leture fate, e al pon une curnîs al om bon dal vanzeli.

L'autôr, seont la tradizion sapienziâl antighe dal piu ebreu, al sa za che il bon di cûr al florissarà come i cedris dal Liban. E je la teorie che: "Se si fâs dal ben, nus vignarà tornât dal ben".

E je la utopie che ducj o sintin e o bramìn, ma che te realtât concrete no simpri e sucêt. Però te fede o savin che, stant cul Signôr, nuie al larà pierdût. Par chest o podìn proclamâ:

R. Al è biel cjantâ il to non, Signôr.

Se cjantât: Il cjant dai salms responsoriâi, p. 233.

Al è biel laudâ il Signôr,
contant il to boncûr a buinore
e la tô fedeltât gnotvie.
Parcè che tu mi âs jemplât di gjonde, Signôr, cu lis tôs voris,
lis voris des tôs mans jo me gjolt a cjalâ. **R.**

I juscj a florissin come palmis,
a vegnin sù come i cedris dal Liban;
riplantâts te cjase dal Signôr,
a florissin tai andits dal nestri Diu. **R.**

A butaran parfin te lôr vecjae,
a restaran frescs e vivarôs,
par contâ che il Signôr al è just, la mê crete,
e che in lui no 'nd è ombre di injustizie. **R.**

SECONDE LETURE

1 Cor 15,54-58

Nus à dât la vitorie midiant dal Signôr nestri Gjesù Crist.

Pauli al continue lis sôs riflessions sul misteri de muart. Sore la muart, par tant che o resonin, il resonament nol ten. L'apuestul nus vise che la vitorie no vignarà ni de sience ni de tecniche; chest al è un misteri che i aparten al Signôr. Di fat, la vuestre vite e je platade cun Crist in Diu (Co 1, 3). Te fiducie di un incuintri finâl: restait salts, no stait a molâ, dait sot plui ch'o podês te vore dal Signôr, savint che denant dal Signôr no lavorais mai dibant.

De prime letare di san Pauli apuestul ai Corints

Fradis, cuant che chest cuarp che si fraidès si sarà riviestût di incorutibilitât, e chest cuarp mortâl si sarà riviestût di inmortalitât, in chês volte si colmarà la perauale de Scriture: "La muart e je stade glotude de vitorie. Dulà ese, muart, la tô vitorie? Dulà esal, muart, il to asel?".

L'asel de muart al è il pecjât, e la fuarce dal pecjât e je la leç. Ch'al sedi ringraziât Diu che nus da la vitorie midiant dal Signôr nestri Gjesù Crist! Par chel, fradis miei tant cjârs restait salts, no stait a molâ, dait sot plui ch'o podês te vore dal Signôr, savint che denant dal Signôr no lavorais mai dibant.

Peraule di Diu.

CJANT AL VANZELI

cf. At 16,14

R. Aleluia, aleluia.

Vierzinus, Signôr, il nestri cûr
e o rivarin a capî lis peraulis di to Fi.

R. Aleluia.

VANZELI

Lc 6,39-45

Cu la bocje si pant dut ce che si à tal cûr.

Il vuarp - il fros e la trâf - l'arbul bon e chel trist - l'om bon e l'om trist - *e il principi gjenerâl - cu la bocje si pant dut ce che si à tal cûr.*

Prime che cu lis Colaborazion Parochiâls technichis, tornìn a lis nestris comunitâts cu la peraule e il spirt dal vanzeli. Il Signôr nus invade no dome a la opare buine esteriôr ma ancje a la riflessione interiôr. Di fat al pues sucedi che par masse apostolât, si finìs cul cjatâsi vuarps, si è pronts a dividisi fra di nô e a cavilâ fra un fros e un trâf. Cun scandul a un di chescj pitinins che a crodin in me, al dîs il Signôr (cf. Mt 18, 6-7).

Che nol sucedi tal piçul ce che par disgracie al è sucedût tal grant, te strafotence dal abûs di podê, di peraule, di autoritât, di porcariis. Fals! Prime tire vie il trâf ch'al è tal to voli...

Dal vanzeli seont Luche

In chê volte, Gjesù al disè ai siei dissepui une parabule: «Puedial un vuarp menâ ator un altri vuarp? No colaressino ducj i doi intune buse? Il dissepul nol è plui grant dal so mestri; par dâle dute, se si sarâ lassât tirâ sù ben, al sarâ compagn dal mestri. Parcè mo cjalistu il fros ch'al è tal voli di to fradi e no ti inacuarzistu dal trâf ch'al è tal to? Cemût puedistu dîi a to fradi: Lasse che ti tiri vie il fros che tu âs tal voli, cu la cuâl che no tu viodis il trâf che tu âs tal to? Fals! Prime tire vie il trâf ch'al è tal to voli e alore tu viodarâs ben tal tirâ vie il fros dal voli di to fradi.

L'arbul bon nol fâs pomis tristis e nancje un arbul trist nol fâs pomis buinis. La virtût di un arbul si ricognossile des sôs pomis: di fat no si cjape sù fics des spinis e no si vendeme uve di un baraçar.

L'om bon al tire fûr il ben dal bon tesaur dal so cûr; l'om trist, invezit, al tire fûr il mâl dal so trist tesaur. Di fat cu la bocje si pant dut ce che si à tal cûr».

Peraule dal Signôr.

Su lis ufiertis

Diu, che tu nus dâs ce che nô o ufrin al to non
e tu metis l'ufierte in cont dal nestri servizi e suditance,
o suplichin il to boncûr
ch'al deventi par nô un premi
ce che par tô bontât al ven segnât a nestri merit.
Par Crist nestri Signôr.

Antifone a la comunion

cf. Sal 12,6

I cjantarai al Signôr che mi à judât,
o vuei laudâ il non dal Signôr, l'Altissim.

Daspò de comunion

Daspò di vênus sostentâts cul to regâl ch'al salve,
o prein, Signôr, il to boncûr:
par che, cun chest sacrament che tu nus nudrissis tal timp,
tu nus fasis vê part de vite eterne.
Par Crist nestri Signôr.

* * *

Riflession di pre Antoni Beline: **Il ben e il mâl a vegnin dal cûr.**

Covential che al sedi il Fi di Diu a dînusâl che un vuarp nol pò menâ atôr un altri vuarp parcè che a van a finîle ducj i doi tal fossâl? Epûr, ditis di lui, chestis peraulis a cjapin un valôr ancjemò plui grant e universâl, come se la sapience eterne e confermàs e a rinfuarçàs la sapience e la sperance dai oms e a son modernis vuê come che lu saran di chi a mil agns.

Nissun vuarp tal cuarp...

Vanzeli par un popul, an C, p. 124

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Se parli male del fratello, uccidi il fratello. Ogni volta che lo facciamo, imitiamo il gesto di Caino, il primo omicida della storia. Non ci sono chiacchiere innocenti. Quando usiamo la lingua per parlare male del fratello o della sorella, la usiamo per uccidere Dio. Meglio mordersi la lingua. Ci farà bene: La lingua si gonfia e non si può parlare, così non si possono fare chiacchiere.

Non c'è bisogno di andare dallo psicologo per sapere che quando uno denigra l'altro è perché lui stesso non può crescere e ha bisogno che l'altro sia abbassato per sentirsi qualcuno. Si impadronisce della persona facendola diventare "seminatrice di zizzania" e in tanti casi "omicida a sangue freddo" della fama dei propri colleghi. È la malattia delle persone vigliacche che, non avendo il coraggio di parlare direttamente, parlano dietro le spalle.

Papa Francesco

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

* *Par domandâ chescj libris scrivêt a info@glesiefurlane.org*